

02/12/1999

Pemuda Umno buat tiga resolusi

KUALA TERENGGANU, Rabu - Pergerakan Pemuda Umno Terengganu hari ini membuat tiga resolusi, antaranya meminta kepemimpinan veteran dalam Umno negeri mengundurkan diri berikutan kekalahan besar calon Barisan Nasional (BN) pada pilihan raya umum ke-10 Isnin lalu.

Ketuanya, Abdul Rahin Said berkata, pergerakan itu tidak menolak faktor kepemimpinan veteran antara punca pengundi menolak calon Umno dan BN.

"Pemuda tidak menolak kepemimpinan veteran diperlukan, tetapi ada masanya kepemimpinan lama terpaksa mengundurkan diri kerana corak kepemimpinan perlu ada perubahan.

"Disebabkan perkara itu, banyak rungutan di peringkat akar umbi dan saya tidak menolak perkara ini mewujudkan pengundi Umno memprotes secara senyap," katanya kepada pemberita selepas mesyuarat mengkaji kekalahan BN di Pejabat Umno, di sini petang ini.

Selain itu, kata Abdul Rahin, membangkitkan mengenai sokongan logistik dari Ibu pejabat Umno yang lambat tiba menyebabkan keadaan menjadi bertambah kelam kabut.

Menyedari hakikat itu, katanya, rata-rata ketua pergerakan itu berpendapat satu persiapan awal untuk memenangi hati generasi baru perlu dibuat dengan bantuan Umno Pusat.

"Ketika ini, Pergerakan Pemuda Umno masih kuat dan mampu untuk bergerak lebih baik dan sistematik daripada sebelumnya untuk merampas semula pemerintahan Terengganu daripada Pas," katanya.

Resolusi berkenaan kata Abdul Rahin, akan dihantar kepada Perdana Menteri, Datuk Seri Dr Mahathir Mohamad, Timbalannya, Datuk Seri Abdullah Ahmad Badawi dan Pemangku Pergerakan Pemuda Umno, Datuk Hishammuddin Tun Hussein.

Semua Ketua Pergerakan Pemuda Umno bahagian hadir dalam mesyuarat berkenaan kecuali Ketua Pergerakan Pemuda Umno Kemaman dan Hulu Terengganu.

(END)